



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA

QUOD LIBETARIIS DISPUTATIONIBUS,
*manè discutienda in Scholis Medicorum, die Jovis octavo mensis
Februarii, anno Domini M. DCC. XLVIII.*

M. ANTONIO BERGIER, Doctore
Medico, Præside.

An Tracheotomia nunc scalpellum, nunc trigonus mucro?

I.



RACHÆA sive aspera arteria ductus est partim cartilagineus; partim membraneus, per quem aer pulmones subit, à pulmonibus regreditur. Admissi emissique aeris gratà vice diù carere vita nequit; hinc primariis vitæ organis meritò accensetur pulmonalis fistula, inde verò perperam creditum quodlibet ipsius vulnus lethale. Est ubi Trachææ vulnere pessumdetur ipsius actio; est ubi illæsa officio suo desit, læsa eodem sat bellè defungatur. Trachæa quidem in totum scētā, subducit se extremum inferius, pressumque ab adjacentibus partibus muneris sui obliviscitur, adestque præ foribus fatum ineluctabile. Ast ubi quantumvis amplo vulnere ita læditur, ut æqua transmittendo aeri via pateat, nihil ferè minùs lethiferum. Id ratio suadet; id ipsum evincunt observata certissima. Frequentissimi quippe Medicis & Chirurgis occurrunt casus hominum quorum alii à latronibus confossi discissam reportarunt asperam arteriam, nec minùs postea sanati fuere; alii vitæ periculi violentas sibi manus intulerunt, mox etiam nonnulli inductam Trachææ vulneratæ futuram dilaceraverunt, pertinaciùs verò commissis iterum glutinatisque arte Chirurgicâ vulneris oris, hi tandem inviti à morte vindicati, illi sibi metipsis reconciliati vitam perpeti didicere. En etiam quod magis mirum intuitu videri queat: nonnemo, insigni Trachææ parte abscissâ & ablata, plurimis tamen annis supervixit,

A

2
licet grandioris vulneris labia ad se invicem adduci nunquam potuerint, sed hiulcum foramen ingens remanserit, spongiâ usque regendum; quod sibi visum testatur Swietenius. His nititur certissimis fundamentis Trachæotomiæ (seu bronchotomiæ aut laryngotomiæ dicere mavis) operatio, quâ scilicet ægris spiritum vix ac ne vix quidem ore trahentibus, Trachæa consulto inciditur, ut ea redintegretur functio, quam diutiùs intermitteri lethale est.

I I.

IMPEDIMENTUM transmittendo aeri duplex inprimis in Trachæa suboriri potest. Sive enim cavum ipsius offerciat inopino casu intrusum corpus extraneum; sive ejusdem orificium appressis invicem parietibus coarctet tumor aliquis, ac præfertim phlegmonodes: durum utrobique suffocationis periculum. Prius nonnunquam incurrunt qui lascivientes inter epulas, cibus ore pleno, in risu inconditos temerè exsolvuntur. Tunc quippe surrectâ subito epiglottide simulque laxatis vocalibus (Ferrenii) fidibus, faciliè deviantia ciborum frustra, fructuum ossicula, aut similia quævis, hiulcum glottidis ostium errore subeunt irremediabili; hinc enim rursus superas ad fauces evadere posse spes adeò exigua est, ut sæpè ipsa ægri conamina strangulationem celerare potius quàm bolum evocare queant. Nec mitius incumbit malum: scibi laryngem glandulasque supremæ parti asperæ arteriæ circumpositas vehementer invadit inflammatio, ut fit in *Cynanche*. Quo quidem in morbo Hippocratica illa occurrit respiratio sublimis, scapularum præcipuè musculis auxiliantibus exercita. Suprà dorsum erectus, jamjam suffocandus æger, amicorum dum implorat opem, pro voce quasi sibilum edit. Sævit acutissimus dolor, ac nili præsentissimum adit auxilium, morbus in horas exacerbatur. Vacillat pulsus, cruore suffusi prominent oculi tubercantes, ore contineri impos lingua velut fune suspensis exferitur, servant dulci aeris refrigerio defraudati pulmones, Tantalus alter obvias hiando vix captat auras, advolantemque pernicibus alis mortem summas inter angustias opperitur.

I I. I.

AD extremos morbos extrema exquisitè remedia optima docet Hippocrates. In utroque casu suprà memorato una salus miseris nullam, nisi gutture ocyùs inciso, salutem sperare. Congruunt tamen unicuique speciei cautele propriæ, aliud atque aliud instrumentum. Ubi extraneum quid interiori aeris ductui præter naturam insidet, experientissimi Chirurgi quo se modo gerant, en accipe. Caput ægri in lecto aut in sella idonea resupinati probè firmat minister quidam à tergo positus. Ipse autem Chirurgus coram adstans, medio ferè jugulo, ab uno circiter pollice infra cartilagineam thyroideam ad sternum usque, cutem cum subjectis musculis scalpello ita dissecat, ut binos tresvè digitos, imò forte quatuor in proceris corporibus, adæquet longitududo vulneris, cujus oræ mox à ministrorum altero per injectos hamulos gnæviter diducuntur; tum spongiæ aut carpti linamenti ope abstergitur cruor omnis, quò faciliùs in conspectum findenda prodeat Trachæa. Ac tandem tres quatuor-ve annuli cartilaginei secundum colli longitudinem inciduntur; atque ita quidquid ibidem intrusum deprehenditur, per immisissum specillum, vossellamve aut hamulum foras protrahitur quàm solertissimè. Quo peractò, nihil aliud superest nisi ut expurgatum deligetur glutineturque vulnus, cujus labia sibi invicem commissa, quasi sponte suâ coalescent. Hac ratione frustum boleti costi, quod viro jocanti simulque jussulum in quo varia condimenta non deerant assatim ingurgitanti, in Trachæam cum imminente suffocationis periculo inciderat, feliciter effodiit Heisterus. Hac eadem arte fabam è ejusdæ gutture extraxit Ravius, ægrumque sospitem in vado constituit. Nunc quoad anginam plura consideranda veniunt, tum quæ Medicum consilium ac prudentiam, tum quæ Chirurgicam operam ministeriumque respiciant. Tempus impendendæ Trachæotomiæ idoneum cautè discernere non cuius datum est. Quandiù resolvendæ inflammationis iusta spes assulget, quidvis priùs tentandum quàm operatio instituat, apparatu ipso adeò formidolosa, exituque nunquam non anceps. Rursus

si phlegmonem jam exceperit gangæna, infarctasvè immeabili sanguine pulmonales arterias doceat pulsus debilis, vacillans, intermittens, cum extremorum frigore; egrægiū remedium ne gratis infametur præpostere adhibendo. Gravissimo quippe morbo conflictatis ritè succurrit Trachæotomia, non in mortis agone constitutis. Nec minori attentione ac solertiâ perpendi meretur locus affectus. Si nimirum circâ laryngem, aut in Trachæa parte superiori inflammatio hæreat, subiectas partes audeto lacerare. Si verò secundum Trachæa longitudinem versùs pulmones serpat inflammatio, quod ferè ex ipso ægri sensu cognoscitur, deploratis jam rebus, ab ea opera superlegendum undè fructus nullus expectari debeat. At si dubii aliquid circa morbi sive præsentem statum sive sedem propriam, atque adeò circâ ipsius Trachæotomiam opportunitatem subesse videatur; Medico fortè etiam tunc satius fuerit à suspectâ medicatione abstinere, ne eum jugulasse putetur quem sua fors confecerit, ipsi autem ægro longè præstabilius in certò lethali cynanche anceps quam nullum remedium experiri; porro Medicis orthodoxis rumores ante salutem ponere grande flagitium censemus. Ubi igitur ingravescens angina medelam omnem eludit, naturali glottidis osculo nimiope coarctato, nova quasi glottis ab arte petatur etiam atque etiam suademus; Albucaque, Caserio, Heistero, &c. calculum addimus, pro imperitis aut meticulosis, imò propè homicidis eos habituri qui dum operationem sæpe valde salutarem temerè negligunt, ægros fidei suæ creditos mortui adducunt indubie. Ant. Brastavolus propriis manibus, detrectante Chirurgo, squinanci cujusdam jam-jam animam expiraturi Trachæam incidit, oricque è faucibus eripuit; & non solum hac vice, sed & aliàs pluriès idem se felici cum successu tentasse scribit. Eodem præsidii genere Benivenius à se subtractum morti anginosum asserit. Nec minus auspiciatâ audaciâ celebratam, tum in hortulano, tum in milite; Trachæotomiam testatur Ren. Moreau. Sic etiam apud Scotos Martinus, apud Anglos Kéen, apud Hispanos Virgili, idem tentare ausi, eandem laudem, restitutis ægris, promeriti sunt. Jam igitur mactè animo, civicam quisquis coronam reportare cupis. Ægro quantum licebit aptè constituto, intersitium tertii & quarti annuli cartilaginei, pertentando indice quæratur; eoque loci chalybeus mucro trigonus*, argenteum indutus canaliculum, in cavum asperæ arteriæ usque uno ictu adigatur. Mox educto mucrone, canaliculus religato ad posteriora funiculo firmatus, emplastroque perforato obfectus, superinductâ rariori quâdam telâ, tandiù relinquatur in vulnere, donec ablata causâ quæ hanc operam exegerat, expeditior forbendo per veram glottidem aeri via pateat. Id autem facili peroscitur experimento, dum nempe canaliculi orificium admoto digito obturatur.

* Vulpè
Troiscent

I V.

ENCHIRESEOS utriusque ratio in promptu est. Ubi noxiæ rei educendæ causâ operatio instituitur; ut ominoso Trachæa liberetur obturamento, iustâ amplitudinis requiritur apertura, quam quidem secans instrumentum ritè præstiterit, nequaquam verò trigonus ille mucro asperam arteriam modico tantum foramine pungens, Interea vix ullus subest sanguinæ derivationis metus; intromittendi canaliculi nulla prorsus necessitas; statimque ab operatione peracta, vulneris labia sibi invicem committere licet, brevi coalitura. Ubi verò ægros prælocans, acerbâ cynanche proximam intentat necem; non adeò magnâ Trachæa incisione opus est, libera ut redeat aeris usura: lineæ unius aut sesquilineæ diameter esto. Plagam verò priùs glutinari nefas, quàm morbi ipsius causam efficaci medellâ sustuleris; hinc relinquendus in vulnere canaliculus; præterea inflammationem è viciniâ accessi propagarique in præcipiti est. Minus itaque ex re in eo casu foret scalpelli usus, à quo nimis operosa sectio, & quasi partitis vicibus peragitur, majori proinde cum dolore, nec exiguæ derivationis metu. Dum verò mucrone illo chalybeo uteris, propere unoque ictu cum integumentis & musculis ipsa Trachæa quantum satis hiat, simulque intromissus adest canaliculus; undè sese nobis amicâ operæ simplicitate mirè probat De-

ekeriana hæce methodus. Præter causas suprà allegatas, nunc exterius compressæ, nunc interius obturatæ asperæ arteriæ, tertium proponit eumque non absurdum Trachæotomiæ usum Dethardingius, ut scilicet efficaciori cor elanguidum stimuletur irritamento, Si quis fortè aquis extractus, non dudùm expirasse videatur, huic quàm citissimè aspera arteria vel triquetro veruculo (si præsto sit) vel lanceolâ, vel etiam cultello vulgari, utcumque aperienda; dein per inflictum vulnus, sive adhibito tubulo qualicumque, sive etiam ore nudo, spiritus strenuè immittatur. Quod si maturè fiat, expanlis hæc arte pulmonibus, motuque cordis exsuscitato, redivivum hominem miraculi instar sistendum expertus spondet Vir clarissimus. Nos profectò in hujusmodi casu trigonum mucronem ad manum adesse ita optamus, ut morosam in instrumenti delectu sedulitatem magis intereâ damnemus; summum enim in morâ periculum est, nullusque aut floccipendendus inflammationis aliorumve accidentium metus.

V.

NEGABANT Antiqui læsas cartilagine posse coalescere; sed error ille jam pridem evanuit. Verebatur etiam Aretæus ne per Trachæotomiâ anginosa augetur inflammatio. Non quidem vanus iste terror; attamen duo sunt quæ nos adversus eum quadamtenus obfirmare debeant. Primò quòd infrà locum affectum fieri utplurimum queat asperæ arteriæ sectio. Deindè quòd non statim inflammenter vulnus labia. Vulnus hæmorrhagiam immediatè concitat, quæ sanguinem potius ab inflammatis partibus revellere, (quod opportunè admodum in eâ ipsâ operatione sibi contigisse refert Martinus) quàm uberiorem copiam hùc derivare potis sit. Mox sistitur hæmorrhagia, tum ob retracta compressaque arteriolarum oscula, tum ob coagulum quoddam stillantibus, sicque aeri oppositis, guttis inductum. Tandem exclusus inde sanguis circumfusa vascula gravat & obstitat, undè inflammatio. Hinc observationibus innumeris compertum est vix antè tertium ab inflicto vulneribus diem ingruere pendentem ab ipsis inflammationem, quod sanè tempus in tam præcipiti morbi impetu lucrifacere non exigui momenti putandum est, cum præsertim efficacissimis remediis exhibendis locum dare valeat. Sunt etiam qui trigoni mucronis usum omninò reprobent; dum enim, inquirunt, magnâ vi in Trachæam mobilem facilièque vacillantem adigitur, periculum est ne aut deviet instrumentum satis crassum, aut posterior cum anteriore lædatur Trachææ paries. Id verò non timuit peritissimus Heisterus; reque ipsâ nullum hujusmodi periculum imminet, modò ne obtusâ acie, aut rudis Chirurgi manu, operatio instituitur,

Ergò Trachæotomiæ nunc scalpellum, nunc trigonus mucro.

DOMINI DOCTORES DISPUTATURI.

<i>M. Franciscus - Nicolaus Gautier.</i>	<i>M. Ludovicus - Renatus Marteau.</i>	<i>M. Claudius-Antonius Re- nard.</i>
<i>M. Franciscus Bidault.</i>	<i>M. Josephus Lallemand.</i>	<i>M. Petrus - Antonius Lepy.</i>
<i>M. Joannes-Claudius Mu- nier, Consiliarius Medicus Regis ordinarius & Domus Regia Invalidorum.</i>	<i>M. Petrus Poissonnier, Pro- fessor & Censor Regius.</i>	<i>M. Henricus Besnier.</i>

Proponebat Parisiis JACOBUS BARBEU DUBOURG, Cenomanensis;
Saluberrimæ Facultatis Medicinæ Parisiensis Baccalaureus, A. R. S. H,
1748, à sextâ ad meridiem.